

LABORANTZA GANBERA. FDSEA sindikatuak eta Paueko prefetak diote ez dela ganberaren gain Euskal Herriko laborantza ganberaz erabakitzea, baizik eta estatuaren gain. Galderaren kutsu «politikoa» salatu dute.

ELBko hautetsiak ez dira berriz itzuliko Paueko laborantza ganberako aulkietara

Euskal Herriko laborantza ganberaren sortzeari buruzko galderari ez erantzutea erabaki du ganberak

Eneko Bidegain | PAUE

Paueko laborantza ganberako ELBko bi hautetsiak ez dira berriz itzuliko bilkuretar, «ez bada deus berriagorik». Mixel Berhokoirigoinak eta Maryse Cachenautek, joan den urtarriaren 31an hautetsi bihurtu ziren ELBko kideek, lehen bilkura zuten atzo laborantza ganberan. Euskal Herriko laborantza ganbera sortzearen aldeko mozioa aurkeztu zuten, baina gehiengoak erabaki zuen ez zela laborantza ganberaren eskumenetan sartzen horrelako galdera bati erantzutea. Bi hautetsiak bilkura gelatik atera ziren, horren ondotik berehala.

Berhokoirigoinak 16:00etan aurkeztu zuen mozioa. Eztabaidan oren erdi bat pasa iraun zuten. ELBko ordezkariak Euskal Herriko laborantza ganberaren eskaera Ipar Euskal Herriko gehiengoarena dela errepikatu zuen. Sindikatuak helburu hori aurkeztu zuen bozetara, eta Ipar Euskal Herrian gehiengoak lortu zuen.

Baina departamenduko ganberako gehiengoak osatzen duten FDSEAk kideek galderari ihes egiteko aitzakiak bilatu zituzten. Sauveur Urrutiagerrek gobernuaren esku utzi zuen erabakia: «Gobernuak eta hautetsiek diote galdera horri erantzun behar». Jean-Pierre Goiti sindikatu bereko kideak bide beretik jarraitu zuen, eta Estatuari argiki erantzutea galdegin. Urrunago ere joan zen, «laborantzako galdera bat galdera politiko bihurtu izanaz» damutzen delakoan. Andre Viau prefetak dudan ezarri zuen Euskal Herriko gehiengoak ELBren alde bozkatzu laborantza ganberaren alde bozkatu zuela.

Berhokoirigoinak berretsi zuen ganberari zegokiola iritzi baten ematea, gobernuaren erabakiaren hartzera bultzatzeko. «Galdera ez badute jasotzen, ez dute Euskal Herriko laborantza ganberaren sortzeko erabakia hartuko», argudiatu zuen. Ez dela berezko departamendu baten beharrik laborantza ganbe-



ANGELA MEJIAS

Mixel Berhokoirigoin, Maryse Cachenaute eta Kristian Harluxet ELBko kideak, ganberan atzo aurkeztutako mozioaren berri eman zutenean.

ESANAK

M. BERHOKOIRIGOIN
(ELB)

«Eskaerari ezezko erantzuna ematen jarraitzen bada, galdera laborarien eremutik kanpo hedatuko da»

JEAN-PIERRE GOITI
(FDSEA)

«Damutu naiz laborantza arloko galdera bat galdera politiko bihurtu izanaz»

SAUVEUR BACHO
(CFDT)

«Aldarrikapen hori argiki ekarri dugu, eta hautesleek baiezko erantzuna eman diote bozetan»

ERABAKI GUNEA

ELB berriz ere «baztertua»

Atzoko bilkuran bulegoko kideak hautatu behar zituzten. FDSEAk kideek sindikatu horretako kideez soilik osatua zen zerrenda aurkeztu zuten, ohi bezala. Maryse Cachenautek salatu zuen FDSEAk ganberaren kudeaketa «gakotu» zuela. Alta, hauteskundearen emaitzak kontuan hartuko zituztela iragarria zuten. Baina berriz ere lehengo huts bera errepikatu dute, ELBren ustez. Berhokoirigoinak «dena zinema» dela eta erabakiak «aitzinetik hartuak» direla deitoratu zuen. Laborantza ganbera ibilmolde «antidemokratikoan» sartzen ari dela gehitu zuen.

ra baten sortzeko oroitarazi zuen. Paueko laborantza ganberak Biarnoako laborantza ereduari jarraitzen diola eta Euskal Herrikoa ez duela kontuan hartzen gehitu zuen.

CFDT eta CGT sindikatuak ere ELBren mozioaren alde bozkatzeko zutela iragarri zuten. Bozketa ez zen iragan. Sauveur Bacho CFDTko ordezkaria ELBko kideen ondotik berehala atera zen gelatik. «Aldarrikapen hori argiki ekarri dugu, hautesleek baiezko erantzuna eman dute», adierazia zuen bilkuran.

Beste fase bat hasiko du ELBk

ELB «beste fase batean, beste logika batean» sartuko da. Indar guztiak laborantza ganbera baten sortzeari buruz ezarriko ditu hemendik aitzina. Prefetarekin hitzordua badute martxoaren 7an gaiaz mintzatzeko. Alderdi sozialistarekin bildu nahi dute lehen ministroarekin bilkura baten eskatzeko. Eskaerari ezezko erantzuna ematen jarraitzen bada, galdera hori «laborarien eremutik kanpo» hedatuko dela abisatu zuen Mixel Berhokoirigoinak.

ANDRE VIAU Prefeta

«Frantsesen ziurtasuna bermatu»



Andre Viau prefetak «frantsesen segurtasunaren bermatzea» aipatu zuen, Euskal Herriko laborantza ganberaren ez sortzeko arrazoi gisa.

Euskal departamenduaren eskaera eta Hego Euskal Herriko bortizkeriarekin lotu zuen ELBkoek aurreratzen duten aldarrikapena. Departamenduaren sortzeak bortizkeriaren gaindikatzeko eta larritzea eraginen duela beldurra zabaldu zuen. Andre Viau Frantziako Gobernuaren izenean mintzatu zen, kontrako jarrera horren esplikatzeke. Estatuaren batasunaren gordetzearen aldeko mezua ere zabaldu zuen Viauk, euskal laborantza ganberaren ukatzeko. «Hori da gure lehen kezka». Diskurtso horrek ez zuen lotsatu, «gutxiengoaren eskubideak errespetatu» behar direla errateko.